

Rapport dalla presidenta per 2020/2021

Miu emprem rapport sco presidenta ei pulit maghers. Muort la situaziun entras il virus da corona ein las biaras occurenzas ni activitads vegnidas stuschadas ni dadas giu.

Las perdanonzas da Schlans, Zignau e Nossadunna ein vegnidas dadas giu.

Ils 17 d'uost havein saviu festivar ina devoziun per l'entschatta digl onn da scola. La devoziun ei stada mo per scolaras e scolars, persunas d'instrucziun e per geniturs da scolarets e scolarettas da scoletta e dall'emprema classa.

Pils 23 d'uost era previu da festivar la sontga messa ell'Ogna. Nus havein decidiu ils 7 d'uost da dar giu quella occurrenza. Il patratg da star da cuminonza fuss staus bials, mava denton buca a prau cun il camond da tener en las masiras da protecziun.

Ils termins da lavar ora las baselgias dils 25 d'uost a s.Martin e dils 3 da settember a Nossadunna ein era vegni strihai.

Ils 13 da settember havess la perdanonza da Nossadunna giu liug, era stuiu vegnir strihada.

Ils 20 da settember havein saviu festivar la fiasta dalla 1. communiun. Sis affons han astgau festivar ina biala fiasta. Il cussegl pastoral ha purschiu in aperitiv ed era la musica ha sunau per quella fiasta.

Il di da suppa usitau era fixaus pils 29 da november, havein era stuiu dar giu.

Egl Advent haiel jeu creau cun ils affons dalla 1., 2., 3. e 4. classa quater scaffas cun ina historia da Nadal. Mintga dumengia seservava ina scaffa e la historia leutier cuntinuava. Mia finamira ei stada da carmalar ils affons e lur famiglias en baselgia. Igl ei denton semussau da Nadal che las famiglias ein buca aschi presentas sch'ei vegn bu purschiu ina messa speciala per famiglias. Lein sperar che nus sappien uonn puspei festivar ina messa da famiglia per e cun ils affons.

L'usitada messa cun uncziun dil s. Ieli havein bu fatg uonn. Las persunas che separticipeschan adina a quella messa ein presapauc tut persunas da risico.

Da Pastgas havein nus saviu guder ina fetg biala messa embelida cun il cant dallas cantaduras Judith e Letizia Scherrer e Rilana Cadruvi. Suenter las sontgas messas da sonda sera e da dumengia havein nus saviu vender usitadamein las candeilas da Pastgas. Nus havein puspei inagada constatau che quellas candeilas ein tschercadas e la glied selegra dallas novas candeilas da Pastgas. Engraziel a Maria, Giulia e Flurina per lur agid.

Ils 16 da matg d'uonn havein saviu festivar a Trun la Creisma. Sur Tomasz ed Avat Vigeli han celebrau gest duas messas ina suenter l'otra ed il cusseg pastoral ha saviu porscher mintgamai suenter messa in aperitiv allas famiglias da fiasta. Era cheu engraziel jeu a tut tgi che ha gidau.

Isabelle Defuns-Gamboni / 09-06-2021